

湖南苗防屯政考

張氏家譜

湖南苗防屯政考卷七

二品銜前署湖南辰永沅靖道但湘良纂

均屯三

詳捐銀贖回苗當民田分別撥用

嘉慶十四年

湖南布政使朱紹曾
按察使傅鼎

爲捐贖苗當民田分別撥用詳明立案事案奉 憲臺批本臬司
前在辰沅道任內詳稱竊照鳳凰乾州二廳沿邊一帶本係民村
自乾隆六十年苗變後民難復業隨將已業當給近邊苗人耕種
職道前於鳳凰廳同知任內遵照 奏定善後章程逐處勘明劃
分民苗界址因苗人時出擾害逐步建碉設卡募勇駐守該苗人

等輒藉有所當民田仍來沿邊窺伺乘間出擾維時職道身爲民
牧未便任其藉端出沒將苗人所當沿邊民田陸續清出捐銀七
千餘兩贖回令其呈繳契紙不可再行耕種以杜衅端因所贖之
田俱在沿邊就近發給駐卡屯丁耕種嗣於各該屯丁名下應授
均屯田地內查其距邊稍遠者照數提出歷年召佃收租分給隨
同辦理均田出力之首事以作公費上年蒙 憲臺均屯未盡事
宜案內 奏准將首事人等改爲總散屯長仍令幫辦屯務每名
在於借用道庫儲備項下官贖田內撥給耕食卽將前給之田照
數收回共計一千九百畝現議於三廳祠廟各儒學並養濟院育
嬰堂及城工歲修分別撥給田畝另案詳明以垂久遠而昭體恤

所有職道前在鳳凰廳任內捐贖苗當民田及此次分撥各緣由
理合開具清摺備文詳請察核批示立案等情奉 批仰布政司
會同按察司查照各另詳批示分案核詳仍候 督部堂批示書
冊清摺並發仍繳又奉 督部堂汪批仰南布政司查核通詳立
案並移該陞道知照仍候 撫部院批示繳摺存各等因奉此本
司等查前項收回田一千九百畝經本臬司在道任內另案詳明
議於三廳各祠廟各儒學並養濟院育嬰堂及城工歲修分別撥
給並現經本司等會核照議另詳在案緣奉 批議相應具文詳
明 憲臺俯賜察閱批示移遵

詳撥給各祠廟歲修時祭田租

嘉慶十四年

湖南

布政使朱紹曾
按察使傅鼎

爲捐撥各廟田畝詳明立案事案奉 憲臺批本臬司前在辰沅道任內詳稱竊照文武官駐守地方捍災禦患惟藉神庥而崇德報功聿明禋祀鳳乾永三廳自乾隆六十年苗變後各廟多被燬壞職道前於鳳凰廳總理邊務及辰沅道任內歷年在三廳地方查明原設及應行添增各廟陸續籌款修造年來民苗綏輯雨應時莫非神靈默佑使一任風雨之漂搖致垣墉之傾圯憑依無自實貽守土之羞至從前苗匪滋事時有紳士丁勇或衝鋒陷陣効命疆場或守義捐軀全家被害此等大節昭然旣設位立祠歲

時致祭尤當煥其廟貌以勸忠義茲職道於捐贖苗當民田內撥
歸鳳凰廳各神廟一百五十畝乾州廳各神廟五十畝永綏廳各
神廟一百畝又撥歸鳳凰廳義勇祠一百畝鳳凰乾州永綏三廳
義烈祠各五十畝以中年核計每畝可歲收租穀一石爲各祠廟
祭祀修葺之需仍責成各該廳督同總屯長妥爲經理年終報道
查核如此捐撥田畝庶各祠廟享祀有資足垂久遠除將田畝坵
段租額另容冊報外理合將捐撥田畝緣由具文詳請察核批示
立案等情奉 批仰布政司會同按察司查議通詳核辦仍候
督部堂批示書冊並發仍繳又奉 督部堂汪批示仰南布政司
查明立案並移該陞道知照仍候 撫部院批示繳等因奉此本

司等伏查鳳乾永三廳各廟宇自乾隆六十年苗變多被燬壞嗣經籌款修建又從前苗匪滋事時有戰士勇丁等或効命疆場或守義捐軀全家被害俱經立祠致祭所有各祠廟祭祀及修葺之費俱不可少應請照議於捐贖苗當民田內撥歸鳳凰廳各神廟一百五十畝乾州廳各神廟五十畝永綏廳各神廟一百畝又撥歸鳳凰廳義勇祠一百畝鳳乾永三廳義烈祠各五十畝以中年核計每畝可歲收租穀一石爲各祠廟祭祀修葺之需仍責成該廳督同該屯長妥爲經理於每年年底將收支存剩數目造冊通齎查核除移道將田畝坵段租額造冊另報外理合具文詳請批示移遵

詳撥給苗疆教職學田

嘉慶十四年

湖南

布政使朱紹曾
按察使傅 鼐

爲捐撥學田詳明立案事奉 憲臺批據南臬司前在辰沅道任
內詳稱竊照地方設立廣文實爲政教之本然必充其日用庶足
以端品學而化士林查鳳凰乾州永綏保靖四廳縣各設訓導一
員地處邊隅官居冷署旣未能席豐履厚室有倉箱又非若大邑
名州門盈桃李該廳縣歲科兩試所進學額鳳凰民生六名苗生
二名乾州永綏民生四名苗生二名保靖八名以積習相沿該教
職等於歲科試畢收受新進諸生贄敬陋規自遭苗變後各民戶
復又均田養勇俱非饒裕之家而各寨苗人甫經向化讀書尤應

倍加體恤業經職道照例嚴飭革除不許再行收受惟該教職等
苜蓿寒氈缺本清苦歲支薄俸實不足以贍養身家查三廳從前
雖皆薄有學田數畝俱係坐落深巢先爲苗佔清釐之後已歸入
苗繳佔田項下今職道於捐贖苗當民田內分撥鳳乾永保四廳
縣儒學田各一百畝歲收租穀以中年核計可得一百石合所支
廉俸足敷薪水之需庶該教職等饗殮有資簞簋自飭既可安心
教導復可自立矩範足以仰副 憲臺整飭官常並體恤窮員之
至意所有捐撥學田緣由理合具文詳請查核批示立案等情奉
批仰布政司會同按察司查議通詳核辦仍候 督部堂批示
書冊並發仍繳又奉 督部堂汪批示仰南布政司查明立案並

移該陞道知照仍候 撫部院批示繳等因本司等查鳳凰乾州
永綏保靖四廳縣各設訓導一員歲支薄俸不足以贍養身家應
請於捐贖苗當民田內分撥鳳乾永保四廳縣儒學田各一百畝
歲收租穀以中年核計可得一百石合所支廉俸足敷薪水之需
以示體恤除移道將分撥田畝坵段造冊查報外緣奉批議理合
會詳呈請批示祇遵

詳撥給養濟院育嬰堂經費田租

嘉慶十四年

湖南

布政使朱紹曾
按察使傅 鼎

爲捐撥養濟院育嬰堂田畝詳明立案事嘉慶十四年七月二十一日奉 撫部院景批本臬司前在辰沅道任內詳稱竊維政在養民惠愛必周於熒獨心存保赤哀矜莫先乎孩提是以

帝澤汪洋醴膏誕布凡一州一縣莫不歲給

帑金令地方官查明鰥寡孤獨疾病困窮歸入院內養濟其通都大

邑嗣又仰體

聖主如傷之仁好義捐貲倩僱乳婦遇有遺棄嬰兒好爲收養卽古人所謂慈幼局而今所謂育嬰堂也卷查鳳凰乾州永綏三廳申報

各額設孤窮口糧十名每名日給米一升折銀六釐自遭苗變後無告窮民多於往昔其稟求入院者因限於常額未免向隅更有貧乏之家子女孔多不能鞠育每致遺棄道旁襁褓無知呱呱而泣於情尤爲可憫茲職道於捐贖苗當民田內撥給鳳凰永綏二廳養濟院各一百畝乾州廳養濟院五十畝歲收租穀增給口糧同額設口糧一體官爲支發至民間遺棄幼孩現據鳳永二廳各紳士及總散屯長等創議於城外建修育嬰堂一所僱備乳婦經理看養惟捐資無多恐不敷用職道亦於捐贖苗當民田內每廳各撥田三百畝歲收租穀以資經費以上田租仍飭該廳督同總屯長妥爲經理年終由廳報道核實詳銷事由官民捐辦毋庸報

部以省案牘除將田畝坵段租額房屋及董事姓名另容冊報外
理合將捐撥田畝緣由具文詳請查核批示立案等因奉 批仰
布政司會同按察司查議通詳核辦仍候 督部堂批示書冊並
發仍繳又稟奉 督憲汪批示仰南布政司查明立案並移該陞
道知照仍候 撫部院批示繳各等因奉此本司等查乾鳳永三
廳各額設孤貧十名每名日給米一升折銀六釐自遭苗變後窮
民多於往昔因限於常額不能入院更有貧乏之家子女孔多不
能鞠育每致遺棄道旁情俱可憫本臬司在道任內已於捐贖苗
當民田內撥給鳳凰永綏二廳養濟院田各一百畝乾州廳養濟
院田五十畝歲收租穀增給口糧同額設口糧一體官爲支發其